

Nuorttanaste

»Gæca dam Ibmel labba,
gutte mailme suddo guodda!«

»Son dagai rafhe su ruosa
varai bokte.«

No. 10.

11ad jakkegærdde.

»Nuorttanaste« maksa ovta kruvna jakkoda-
gast, bladde dinggujuvvu juokke poasta-
rappe lutte.

30ad Mai 1909.

»Nuorttanaste« olgusboatta guovte gærde
manost — dam 15ad ja dam 30ad bæive
juokke manost.

Barrabas addu- juvvu luovos, Jesus russinavllijuvvu.

(Mark. 27, 15 j. v.)

Obba gillamušahistoria læ lik-
katatte ja vaibmoičuoppe, mutto
æmbo vel dat dapatus. Mi aiggop
gæcadet dam guovte persovna,
soappaba go soai okti. Barrabas,
cælkka Matheus, læi okta rievvar
ja olmušgodde, okta gielda baha-
mus suopatusain; okta daina stuo-
ramus bagjelduolbmin, gæst fert-
tijegje ballat olbmak nuftgo nis-
sonak, ja dam olbma datoi alb-
mug, atte Pilatus galgai luovos-
addet, mutto Jesusa, dam vigitæ-
me, gutte manai birra ja dagai
buore buokai vuostai, dalkasti
buccid, jeddi moraštegjid, galleti
nælggegillajegjid, jugati goikkid
ja bajasbovti jabmid, dattu si rus-
sinavllijuvvut, ja sin savaldak šad-
dai devddujuvvut. Barrabas mak-
sa: Açe bardne, gæn açe bardne
dat rievvar læi, cælkka Johannes
8 kap. 44 v. Nuft čuožžo Barra-
bas, su ačes bærgalaga bardne ja
Jesus Ibmel Bardne, Açe čielgga
govva, baldalagai.

Goabba dattobetet di, atte
mon galgam digjidi luovosluoittet,
Barrabasa daihe Jesusa, gutte
goččujuvvu Kristusen? Dego son
aigoi cælkket: „Son læ juo din
gonagas; dat i læk gukkes aigge
dam rajest go di gudnijattidek
su danen. Di dattobetet su luov-
vos vel dam lakkanægje allabas-
sai?“ Mon im mate dam jurdašet,
atte di dattobetet Barrabasa luov-
vos, gæn giedak viggek goikkat

olbmu varast. Di epet sate gos-
tege læt nannosak hæga diti Mut-
to si čurvvuk: „Adde migjidi
Barrabasa luovos ja divte Jesusa
russinavllijuvvut.“ Vaivan olmai,
maid galgak don dal dakkat? Son
læi ollaset visses dam ala, Jesus
læi sivatæbme, ja dal galgai son
naggijuvvut addet su russinavllit.
Son i lifči galggam mannat ak-
kordi singuim, mutto valddet nan-
nosebbo aiggomuša. Dal čuožžo
son dego bakkašuvvam barko ja
muora gaski. Gosa galgga dat
vaivan olmai dal? Go son čokka
duobmostuolo alde, boatta sadne
su rakis akast sudnji: „Ale daga
maidege dam vanhurskasi; dastgo
mon læm ollo gillam odna ija
niego siste su diti,“ nuft čuogja
sadne. Dat sadne dam arbmogas
Ibmelest, gi manemuš čalbme-
ravkkalamboddost aigoi boestet su
sielo hævvanæmest daggo bokte,
atte son i cælkam duomo su je-
čas barne bagjel. Jurdaš, mag-
gar atestusa dilest son fertti læt.
Su oamedovddo fertti doargestet.
Dat orro mu mielast dego son
čökkai ja doargesti obba rubmaša
bagjel balo diti. Moft dadde læi
hirmastuvvam su akka, go son
bodi ruoktot ja muittali, atte son
almaken læi dubmin Jesusa jab-
memi su akas rokkadusa ja rav-
vaga diti. I son ješ ige su akka
oažo šat illobæive. Dat bæivve,
goas son dubmi Jesusa, datto
čuožžot su ja su aka oudast dego
okta baldos bæivve. Dat i væke-
tam maidege, vaiko son basai su
giedaides dallanaga ja celki: „Mon
læm vigitæbme dam vanhurskasa
varaidi, geččēt di dasa!“ Dast i
læm galle dasa, atte orostattet

dam bahas oamedovdo jiena. I
læm imaš, nuftgo muittaluvvu, at-
te son arvo mielde 6 jage dam
dago mannel loapati su hægas
nuftgo Judas Iskariot ječas-sorb-
memin.

Jerrop dal aldamek, gæn mi
læp addam luovos ja gæn russi-
navllim. Mon oaiveldam, atte mi
buokak darbašep sogjalattet min
oaivvamek vuolasgæččē čalmiguim
ja čuorvvot: „Ibmel, armet min
bagjel! Mon læm mielde læmaš
russinavllimen du barne, mu sud-
do du vuostai læ dakkam dam.“
Don diedak sagga buorebut go
Pilatus, atte Jesus i læk dakkam
maidege bahaid. Don diedak nuft
burist, atte son læ boattam bæst-
tem varas du erit dam agalaš
hævvanæmest, manne aigok don
læt nuft garranakalaš, atte bag-
jelgæčak su bæstem fallujume,
valde vnostai dam ja ale šat čnor-
vo gukkeb: „Erit suina ja adde
mudnji luovos Barrabasa!“

Ale bagjelgæca du ædnad rokkadusaid.

Væiggen čokkaimek mi okta
ucca jovkoš ustebak, ja sarnodei-
mek gutteg guimidæmekguim ovta
amas œdnamest. Mi sarnodeimek
sidaædnama birra davven, mærra-
olbmai-miššona avkalašvuoda bir-
ra, ja mi lonotaddaimek jurdda-
gid agalašvuoda gačaldaga birra.
De læi okta min gaskast, gutte
namati ædnerakisvuoda ja dat sad-
ne addi min sagastallami ovta
odda jurddaga. Ædne namast læ
okta erinoamaš fabmo dasa, gutte
vagjola okto mailmest, gost son
nuft davja dæivva galbmasa ja

vaiko maggar ællema. Dat rabasta vaimo, ouddanbukta gova dam rakis sidast ja čujota bajas čuvvggis mailme vuostai.

»Olmuš i berre goassege bagjel-gæččat ovta ædne rokkusid,« jienadi okta daina lagasoroin, »mon læm ješ oaidnam, atte dat bukta garrodusa dam bagjeli, gutte dam dakka.«

Min ovtarađalaš halidusa mielde loppedi son æmbo sardnot, dam maid son oaiveldi. Mi bigjaleimek æmbo koalaid oabmani ja dagaimék ječamek gærgosen su muittalusa gulddalet, ja dat jaskis væiggeboddo dagai, atte dat šaddai vela muittaluvvut æmbo njuorasmatte lakai.

Ædnag dalve muotta — nuft algi son — ja ædnag gæse arvotese læ juo gokčam dam havde, man vuolde dat ovta gærde nuft raffhetes vaibmo — man birra mon aigom sardnot — vuoiŋada. Mutto mon muitam ain su surggadlaš ællembistoria nuftgo niego, manditi olmuš datto morra-net. Mon oidnim su davja vagjolčemen birra gavpugest dobbe sidast, ælelassi gaskaoabme manai ja nuorragærde suotasvuodaidi. Su amadajo bagjel vuoiŋadi okta čiegnalas atestusa mærkka, ja nuft davja go mon gavnadin suina, čuorvoi son daggar suobmanin, mi davesti su sielo hæde: »Ale bagjelgæča du ædnad rokkadusaid!«

Okta bibal, mi i sate

šat lokkjuvvut.

Bladde »Hjemlandsposten« muittal:

Dat vuostas engelas bakenmiššonæra læi John Eliot, Cambridge'st. Jagest 1631 jottai son rasta Atlanterabe ja bargai Ibmel rika oudedam varas 60 jage Roxbury'ast, lakka Bostona. Dam aige legje Massachusetts vuovdek dievva Indianerin. Dai særvest bargai son æljaret ja likkoin, mi buvti sudnji dam ligenama »Indianeri apostal.« Son jorggali obba bibala sin gilli. Mi illa mattep arvvedet dam vaddesvuoda dam bargo siste, mi su dæivai; mutto mi arvvedep vebaš, go mi gullap daihe oaidnep, atte okta aidno sadne dam gielast (sadne »Katakisimus,«) čajeta navt: Kummogokdonattoottanmuctiteangannunnonash.

Su valljosadne læi: »Rokkus ja barggo, oskoin Jesus Kristus ala, mata dakkat, mi galgaš.« Damditi oažoi son olles bibala gærgosen jagest

1661. Dat læi dat vuostas bibal, mi goassege læi prentejuvvum Amerikast. Son eli nuft gukka, atté vela morraša ani oažžot gærgosen ovta, huoreduvvum bibala 1685, go son læi 80 jage boares. Dak hirbmos olgusgolok maksujuvvujegje ovta engelas selskapest. Go son vællai jabmingsangast 1690, mati son cœlkket: »Mu jierbme mu guodda, mu muitto sæmna, mu njuovša maid, mutto mon gitam Ibmela, go mu rakisvuotta bista ain; mon gavnatam, atte dat lassana æmbo go uccana.«

Dat læ imaš ja likkatatte jurdašet, atte dallanaga dastmaŋjel algge, æi dušše Indianer-oskolažak, mutto maidai Indianer-maddoge ješ uccut ja jabmet. Dam jakkečuode gaskarajest i loek læmaš oktage, gutte læ mattam lokkat John Eliot bibala. Dalle šadde prentejuvvut 3000 bibala, mutto dal æi gavnudat šat čuotte, ja dak maksek bagjel 1800 kruvna gappalak.

Dat bibal i sate šat dal fievredet ovtage sielo bestjubmai. Mutto hærvasvuodast šadda dat vurkkijuvvut muitost John Eliot sævdnjadasa mat-tajegjin, gæk dam bibala bokte gavnere gæino Ibmela paradiaši.

Dærvuodak Sigerfjorast.

Arbmo ja rafhe!

Aigom daggo bokte saddet moadde sane ustebidi gukken ja lakka ja muittalet, atte mon ælam dærvan Ibmel armost. Nuftgo di oaidnebetet, de læm mon fast ollim deike mu boares barggobaikkasam, gost mist læ — oažžo dagjat — gæsse. Gieddek læk juo runodam. Muorak maidai iditešgottæk sin šaddosek, ja jos nuft manna, de fast šaddek farga dak čæppis vuovdek ruonan. Maidai bæivaš baita ja adda su lieggases muddaget. Ja vai šaddo buorebut ouddana, de sadde vel dat buorre Ačče arve ædnama laktadam varas. Nuft atte mist gal læ juo gæse alggo; mutto dinguin Sameædnamest daidda læt čera lakai. Mon jurdašam dal din ala, gudek asabetet Sameædnam vuonain, njargain ja duoddari gaskast, gæk lepet dam galbma dalve vasetam daina burin doaivvagin, atte gidđa farga boatta; mutto i dat daide læt vel dæivvam buok sajin nuft.

Mon jurdašam, daidda soames Same viellja ja oabba, nuorra nuftgo

boares, čokkat nierain gieda vuostai ja jurdašet lossadet dam garra gida ala, moft daina galgga mannat. Ja gibe dam imašta? I oktage, gutte Sameædnam burist dovdda su dilalašvuodaidesguim. Dobbe læ galmas. Uccan fuođar omidi. Fuones aiggai-boattemlake, mi i buok uccemusat losidatte olbmju jurddagid. Uccan vække oažžot, jos hætte gartta. Nuft maidai jeddetus — Daidda soames čokkat moraš mielain ja aibaša jeddetusa maŋjai. — Dam bottim mon dovdadat mangi dam dalve, go mon legjim mu riegradam ædnamest. Mangi bottim mon ješ dam dovdadat, ja gavnim maidai æraidge dam dilest. Eri-noamačæt muitam mon ovta oaba, gi čieroi nuft ladđaset ovta bæive, go mon čægnalim su vistai. Mu vaibmo njuorran ja ganjal algi mu nieraid laktadet. Son læi massam su oabas, ja dam bæive galgai dat dolvvujuvvut su maŋemuš vuoiŋadam sagjases. Dat læskanisson darbaši jeddetusa. Son bođi dovdadat, atte Ibmel læi saddim mu sudnji jeddijægjen. Go moai ær-raneime, de addi son mudnji su adressas, vai mon čalašim sudnji; mutto go must læ nuft ædnag čallamuš, de im mon matæ buokaidi astat čallet. Mutto muite dam, rakis oabba Hærra siste, mon muitam maidai du, ja mon cœlkam dudnji ja buok moraštegjiidi dam jeddetus sane: **Jesus Kristus læ ikte ja odne okta daga ja agalaš aiggai.** Gæst son læ vaimost, sust læ maidai jeddetus. Nuftgo son jeddi læskanissona Nainest daggo bokte, atte son bajasbovti su barne, ja Maria ja Marta fast daggo bokte, atte son bajasbovti Lasarusa, nuft jedde son maidai min buokaid. Dat sæmna Kristus, mi son dalle læi, læ son ain dalge. Son i æratuva goassege Balkkesteket su ala buok din morrašidadek, son aiggo daiguim giksašuvvat aido sæmma lakai go son giksašuvvai Getsemane gardest dam sevdnjis ja lossis ija, go son vuiti min oudast buok suddo bagjel. Su lutte i gavnun erotus. Son aiggo læt nuft gidda maŋemuš hoddo ragjai. Gitujuvvum lekus su namna.

Dal go mon læm din guoddam ja im ole šat digjiidi sardnot dam rus-sinavlijuvvum bæste birra, de fertte dat dæpatuvvat »prænta« bokte; dastgo Kristus a rakisvuotta bagge mu dam dakkat. Mon im sate din vajal-

dattet, rakis Same vieljak, jos vela dige mu vajaldattebetet; dastgo mi læp divrraset ostujuvvum buokak daina aidno bæste varain. Mendo divras hævvanæbmai mannat.

Ja Kristus i læk goččom min čiekkat čuovga; mutto bigjat dam daggar sagjai, gost dat oidnu ja čuovgga dam sevdnjis mailbmai. Muite dam, rakis bestujuvvum oabba ja viellja. Dat læ min gædnegasvuotta, atte muittet gutteg guoibmamek.

Maŋašassi saddim mon daggo bokte mu vaimolaš dærvuođaid buokustebidi, gæidi mon šaddim oapes Sameædnain vuonain, njargain ja duodarčoroin, ja gitam din buok dam buorrevuotta oudast, maid di lepet mu vuostai čajetam.

Hærra buristsivdnedekus din ja dam bargo, mi læ dakkujuvvum din gaskast, ja addus miŋjidi buokaidi ovtá audogaslaš oaidnalæme jōgo dabe daihe dom ællemest.

Ællet dærvvan Hærra sistel
Vaimolažat
din **Oyla-Andras.**

Gitost!

Luther celki ovtá have, atte jos Ibmel luotaši bæive ittét dušše ovtá gærde ain jagest, de dalle avvodifčee olbmuk dam bæive illomallasiguim, mutto dal go dat dpatuvva juokke bæive, de æi jurdaš olbmuk, atte dast læ mikkege dam oudast gitet. Aa, jos mi vaiddalifčimek ucceb damditi mi mist vaillo, ja gitaseimek æmbo dam oudast mi mist læ! Dat datoši dakkat min ællema likkolebbon ja čuovggadebbon.

Fæila divvujuvvu.

Nummar gavcest čalimek mi vebaš Alaska birra, mast maidai namatuvvui, atte Alfred Nilimast legje 7000 boccu (gæča goalmad sido goalmad spaltast.) Dat galgga læt **900 — ovce čuode —** boccu.

Ođđa konfirmašona ordneg

læ gonagaslaš resolušona bokte dam 1as februar d. j. sisabuktujuvvum danska girko. Dam ordneg mielde galgga konfirmašon doaimatus mannat dam lakai, atte pappa, maŋnelgo salbma læ lavllujuvvum, vuost doalla sarne manaidi, man maŋnel manak iskujuvvujek kristalašvuotta dieđost. Dastmaŋnel sardno pappa oskodovdastusa særvvegode nammi ja nævvo

sin manai oudast rokkadallat, ja de æska buristsivdneda sin giedaid ala bijadedin. Dat boares konfirmašon vierro satta daddeke adnujuvvut, gost pappa ja særvvegode oaivek læk ovtarađalažak dasa. Jos si æi soaba, de galgga dat ođđa asatus valddut adnui.

Værrō gattoi?

Kristianiast arvvala spirid bagjeligæččam særvve, atte saddet gaibbadusčallaga bivdem varas oažžot væro gatoidi Kristianiast. Dobbe læk namalassi nuft ollo golggo gatok, mak mannek birra gavpuga ja suoladek nælge diti. Særvve jurdaša væro bigjam bokte oažžot æigadid æmbo bærraigæččat sin gatoidæsek ja adnet oudastvastadusa dai oudast. Særvve læ fertim daina maŋemuš jagin goddet ollo gatoid, mak læk gavdnum stuoremus varnotesvuotta dilest.

Oapa vuogjat!

Arvo mielde 600 olbmū hævvanek dabe Norgast jakkasažat — okta duodalaš čuorvas buokaidi atte oappat vuogjat.

General Stössel ja admiral Nebogatow læba kaisara riegadambæive gæčeld armetuvvum ja læba dal luovos luittuvvum Peter Paul giddagasast.

San Francisco,

Kalifornia oaivvegavpug, mi billašuvvui ædnandoargastusa gæčeld 1906, læ fast bajasčuožaldattum gunai siste stuora jottelvuodain. Maŋnel billašume oroi čajetæme, atte dat gavpug i sattam nuft farga fast bajascægganet, mutto dušše golma jage sisa læ bajascægganam ođđa San Francisco, čabba-sebbo ja stuoreb go dat boares. Arvo mielde 28000 asse dušše dam ædnandoargastusa gæčeld. Dal læk bajascægganam 16,831 ođđa vieso stuoreb saje ala, go dak billašuvvam 28000 valdde, ja daid ođđasist huksijuvvum viesoid mævsolašvuotta læ arvo mielde 530 miljon kruvna. Ođđasist huksijuvvum viesok læ ænaš rakaduvvum stalest ja ruovdde-cementast. Maŋnel likkotesvuotta manai San Francisco olmušædnagvuotta vuolas 45000 rajest gidda 35000 ragjai, mutto dađestaga sirdde olbmuk fast gavpugi, nuft atte dam maŋemuš olmušlokkam mielde gavdnujek dal dobbe 507,000 asse.

Doala „Nuorttanaste“!

Manai arbbe.

Okta gavppeolmai addi obba su obmudagas su manaidasas ja dak loppedegje su bajasdoallat su amnatdila-lašvuoda mielde. Algost manai burist, mutto smavvat ja smavvat šadde manak garrasæbbo su vuostai. Si lo-gatalle borramušbitta su njalbmai ja æige addam sudnji rivtes biktasid. Dat vaiddalægje aččee celki davja: »Mon læm boastot dakkam, go mon addim buok mu manaidassam. Dat lifči læm buoreb go si lifčee must adnom juoga dam sagjai go mon galgam adnot sist juoga.«

Ovtá manost oažoi dat vuoras olgusmaksujuvvut 20,000 kruvna, maid son læi aigga gaddam duššam. Son dagati ovtá ruovddebomba mangain lokkain vurkkim varas su golles čam sisa. Manak fast algge guoibmaduššat aččesek ja dikšot su buoremus lakai eažžom varas maidai daid ruđaid. Mutto son i addam sigjidi i evrege, ja si jeddijegje ječesek daina, atte si galggek arbbet. Aččee jabnema maŋnel rabastegje si bomba daina burin doaivvagin, atte oažžot dam sistdoalo ja juokket dam. Mutto aččee læi suollemasat skenkkim golle muittom æraidi, ja dævddam bomba geđgiguim dam sagjai. Geđgi baldast gavdnuu okta sæddal, man ala son læi čallam: »Daidi manaidi, gæk dikšok aččesek nuft giteinættoset, galgga goile nubastuvvut geđgen.«

Garra dalkke Sameædnæmest.

Stuora skadða. Mangas duššam.

Mietta Varjagvuona læ garra dalkke dakkam vahagid luossa-bivddosid guovddo. Dušše Bugønæsast læ skada dakkam 2—3000 kruvna ouddi, nuft atte dat okti-bigjum vahag luossabierggasid guovddo satta vissaset celkkujuvvut arvo mielde 10,000 kruvna. Örtangenest, Čaccesullust læ dakkam vahaga 2000 kr. ouddi. Okta šoita Krampenæsast læ aibas billašuvvam, dat læi assurerijuvvum. Dat buok verremus læ, dam saga mielde, maid „Finn. amtst.“ læ ožžom, atte 11 olbmū hæga læ duššam.

Okta šoita Balsfjorast erit læ massam 2 olbma olgobæld Havningbierge.

Bæralvagest muittaluvvu, atte

8 šöita ja 1 jagta læ forlisem ja manga gillam vahaga, mutto i oktage olmuš duššam.

Syltefjorast muittaluvvu, atte 4 vadnas læ cuovkanam ja 1 olmuš duššam.

Havningbiargest 4 otringa aibas duššam ja 6 æra vadnas billašuvvam, ja 2 olbma Ibbestadast erit læ bartašuvvam linagæssem mokkest Baadsfjord abest.

Maņašassi muittaluvvu Vargain, atte 1 bivddedamppa læ massam 3 doryer (vadnas) 6 olbmain.

Ednamdoargastus ja jieņavarre.

Ednamdoargastus Amerikast læ læmaš nuft garraset, atte dat læ ouddanbuktam dievva smava sullui Labradormerri ja luovosgaikom dievva jieņa varid, mak læk rievddam oarjas guvllui ja vahagattam manga skipa.

900,000 kr. lige olgusgolok.

Dak lassanægje olgusgolok statakassi oapataegji balka bokte arvvaluvvu gartat 900,000 kr. baiki.

14—15 diggeolbma

rekkenastek socialistak — Egede Nissen bokte — oažžot boatte stuoradiggai. Si jurdašet vuottet Ringerika, Nedre Eker, Nordre Salten ja Vesteraalen.

Ruoša kæisar Norgi.

Stockholmast muittaluvvu, atte kæisar maņnel helludagaid oappaladda gonagasaid Danmarkost ja Norgast, dastmaņnel Ruotast.

Varalaš buogodavdda.

Maddakinast læ boccidam buogodavdda. Bæivalažat jabmet 50 olbmu.

Petersburgast maid vutto buogodavdda. 3 læk dast fattetallam, 2 spittalvuodast ja soabmasak fast koleradavdast.

Norga tuollosisaboadoĳ

dakke oktibuok 2,090,000 kruvna dam sagjai go dibma mai manost 2,172,000 kr. ja dam vuostas 14 manost bušetjagest 1908—1909 51,809,000 kr. daihe 109,000 kr. æmbo go mannan termin 15 manost.

Stuora koallabaikke
læ gavdnum Islandast.

Aimo borjastæbme.

Londonest: Wilhelm Wrigt læ cælkam, atte olmuš oažžo læt visses dam ala, atte ovta jage sisa læ ožžujuvvum maidai aibmo skipa borjastæbme rasta Atlanterabe.

Sikke roaš- ja nisojaffo

divrru ain. Erinoamačet nisojaffo hadde læ stuores, mutto ain vurdjujuvu bagjanet.

Sameædnam-bivddo.

Sæktevadnevuotta hette bivdo.

Maņemuš gæssemest hui burist Baadsfjord—Mehayna gaskat, buoremusat Baadsfjorast 1000—7000, Kongsfjord 1400—5000, Bæralvagest gidda 6000 ragjai, ovta ja guovte gæssemest.

Væsta Sameædnamest uceeb, buoremusat Gjæsvierast 100—1200, Rolfso 100—800, Iččain 100—1100.

Maņnel Vargain: Šöitak ovta ja guovte gæssemest 2000—7000, Baadsfjorast šöitak 1000—3000, Bæralvagest 1000—2500, Gamvikast 0—1200, Mehavnast 30—2600, Skiettebiargest 0—650, Gilevuonast (Kjøllefjord) ovta gæssemest 0—1600, Kjelvikast 100—270, Skarsvagest 400—600, ovta gæssemest 2000, Gjæsvierast 100—500, ovta gæssemest 1600, ovta ja guovte gæssemest 2000 ragjai.

Guollehadde læ 6—9 øra ragjai kilost, vuovvasest 6—12 øra litarest.

Papegoia baldi navddijægje.

Okta danska doavter, gæn namma læi Jensen, læi ovta papegoia æigad, gutte alo gulai olbmui vaiddemen čielgga danskagilli:

»Vuoi! Jensen! Mon læm nuft hægjo.«

Papegoia oapai dam skuvlast, gost dat manai, ja jievžai davja:

»Vuoi! Jensen! Mon læm nuft hægjo.«

Mutto ovta bæive, de jami doavter, nuftgo juo buok doaktarak fertti-jek dakkat, jos si æi james ikko.

»Polly« (nuft læi papegoia namma) oažoi æra iseda, gutte i passim dam oalle burist, manditi dat vaiddali nuft davja: »Vuoi! Jensen! Mon læm nuft hægjo.« Mutto ovta bæive bæšai dat olgus ja girddeli močcai. De daptuvai datges, atte navddejægje

Buoček, aiccet dam!

Hr. Johs. T. Hansen apparatak læk erinoamaš ja mainotatte, ja berrijek fallujuvvut juokke gillajægjai. Mon im sate vajaldattet dam dakkamest, damditi go mon 10 jage læm gillam hirbmos bakčasiid sidost, vaiko læm adnam mangalagaš radid. Adnem bokte hr. Hansen apparataid, Bergenest, dærvasmuvvim mon aibas oanekaš algest.

Frk. T. Vold, Troandemest.

Mon lein manga jage giksašuvvam læsmest ja bottanæmest, mi mieldesbuvti hirbmos givo, ja læm adnam manga rađe, lakkid, apparataid ja boakkanid moaddelagaš baikin. Ovta oappas bokte ožžom mon sadjujuvut Bergenest ovta hr. Johs. T. Hansen elektro-magneta apparataid ja šaddim oanekaš aige maņnel mælgad dærvvasæbbo, vaiko mu akke læ 80 jage. Falam dam iloin juokkehažži gutte gilla semmast.

Ane Saltvedt, Haugesundast.

Fuobmašebme oapata æmbo ja æmbo, atte dat elektro-magnetisma fabmo bagjel-manna æra dalkastam radid, ja atte dat læ dat buorenus radde apetesvutti ja hæjoidi, dattonavcatemidi, helkidi bagjelraččamidi ja æraidi, gæk garra davda daihe miellagillamušai bokte læk massam sin vuostaičuožžodokkalašvuoda.

Bævva 85 øra frimærkaigunim poastaadresain
Johs. T. Hansen, Bergen.

Jensen læi navddestaddamen ja bođi lakka dam muora, gost Polly čokkai. Jensen galdesti bisso ja bači ja Polly gaččai soagjabaččum vuolas ædnami. Stuora movtain viegai Jensen su fidneges viežžat. Mutto semmast go son sogjai vuolas valddim diti lodde, celki dat:

»Vuoi! Jensen! Mon læm nuft hægjo.«

Ballaigo Jensen ja viekkali? Juo, dat muittaluvvu, atte son balkkesti bissos ja viegai hægas oudast battarussi; dastgo son jakki, atte son læi baččam bahakasa ječas.

Sameædnamest

muittaluvvu gidadalke ja bæivadaga birra. Dat bahamus læ dal bagjelomid dafhost Sæiddebivddo notin læ alggam.

Ednam dørskebidok

29ad mai ragjai 52⁷/₁₀ million stk., maina 26⁸/₁₀ hængastuvvum, 22⁹/₁₀ salttjuvum, 47,175 hl. dampmedicinvuogja, 25,835 vuovvas, ječa vuogjasortak 1908 ektoi 44⁸/₁₀, 16⁸/₁₀, 26⁸/₁₀, 54,796, 24,008, 1907: 45⁴/₁₀, 15⁹/₁₀, 28⁸/₁₀, 45,017, 20,396, 1926, 52⁶/₁₀, 15, 26⁸/₁₀, 38,956, 15,385.

»Nuorttanaste« čalle, prentejægje ja olgusadde læ G. F. Lund Sigerfjord, Vesteraalen.